

## Teresita Center



Teresita Center, antes tabata International Seamen's Club, unda marineronan tabata pasa nan tempo liber, comunica cu nan famianan y haya tur sorto di ayudo mientras nan ta traha riba lama y leu for di cas. Un club cu a habri oficialmente na aña 1934 den un cas di palo. Despues a move pa esun actual y despues cu su remodelacion a habri oficialmente dia 7 di augustus 1959. Segun mi ta compronde cu na aña 1977, el a dal sera su portanan, motibo ainda desconoci.

E edificio ak a wordo traha riba tereno di Diocesis. E tempo ey Notario Thijssen, den e traspaso, a inclui un clausula cu ta bisa cu dia e luga aki sera, Diocesis lo tin e prome opcion y derecho riba e propiedad. Poco lo e por a imagina cu e clausula aki tabatin asina hopi balor.



Cu ayudo di Notario A. Eman e edificio a wordo pasa over pa e Diocesis di Willemstad na januari 1982. Despues di reparacionnan extensivo y benta di inventario, etc., Teresita Center a habri oficialmente dia 26 di december 1982. Na inicio di aña 1983, a busca un famia cu por a maneha e centro, por ehempel, den cuidado, mantencion y limpieza, cuminsando dia 1 di augustus 1983.

Den e añanan cu a sigui, e centro a crece den un luga hopi activo pa reunionnan di diferente grupo den e parokia. E directiva a zorg pa e centro keda den un espirito religioso. Den cuminsamento di 1990 e edificio a cuminsa muestra cu e tabatin mester di reparacion urgente. E

comision financiero a wordo yama pa yuda cu e situacion. Pastoor Janssen, kende tabata un miembro di e comision financiero di e Diocesis, cu asistencia di Aruba Bank, y un contratista local a traha plan pa duna e edificio un cara nobo. Tambe tabatin un plan pa organisa un Nochi Caribense semanal cu e meta pa atrae turista pa San Nicolas y e centro, Un podium y sistema di lus y sonido a wordo regala entre otronan pa e proposito aki. Sinembargo, e idea nunca a formalisa, y e centro a keda inoperabel, ningun actividad pa recauda fondo tabata necesario pa sigui mantene, solamente pa e padvindernan y grupo di oracion kendenan a ocupa e centro semanalmente. Tambe tin bes ta permiti pa tene fiesta familiar pero cu hopi respet pa motibo di su localidad pega cu e misa.

E comision financiero di Diocesis a wordo enfrenta cu e problema kiko pa haci cu e edificio, bende of tene. Tabata pastoor di e parokia hunto e cooperadornan pastoral cu a dicidi di purba convence e comision financiero pa no bende, pero pasa e edificio pa e parokia. E idea a wordo acepta y e parokia a wordo notifica na cuminsamento di aña 2004 pa acepta a proposicion pa e traspaso.

Bou direccion di Pastoor Canuto (Toty) Fuentesbella, un comision a wordo lanta pa bin cu plan pa reactiva e centro.



Asina nos por ripara cu e club a keda activo y varios actividad ta wordo celebra den e centro aki. Un di e actividadnan cu mas a resalta den Teresita Center te awo tabata dia 24 di april 2014 cu un ceremonia di

condecoracion a tuma luga den e centro aki. Gobernador, Sr. Fredis Refunjol e entrega e mainta aki diesun condecoracion, celebrando e momento historico di e prome Dia di Rey pa nos pais hoben y pa di prome biaha den historia, den Teresita Center y tambe na San Nicolas. Pa motibonan tecnico organisatorio cinco persona mas no por tabata presente pa ricibi e “lintje”. Gobernador a bisa cu nan lo ricibi esaki riba un otro dia.

Un mainta sumamente bunita pa mira esnan den nos comunidad cu ta dedica nan tempo liber den trabounan humanitario wordo honra.

(E storia aki ta posibel, danki na mi amigo riba Facebook, Sr. Elias Wilson cu a bay busca e informacion den e archivo di parokia. Hopi danki amigo Elias.)

*Dufi Kock*

*Escritor y Historiador*

*20 di augustus 2020*